



10. oktober 2019

UKA 2019/86  
Siverth K. Heilmann

**Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinut tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaangitsumik nunat allat ilinniarfigalugit aaqqissuussinissaq.**

(Inatsisartunut ilaasortaq Aqqalu C. Jerimiassen, Atassut)

Takornarissat iluatigingangaaratsigit, qujarutingaaratsigillu allaat nunarput akeqanngiusartumik værsgo'rparput. Ajukkuppallaarujussuarpugut aali takornariaqarneq aningaasarsiutigerusutsigigaluaripput.

Nunatsinni unnuisarfiit aasakkut ulikkaavillutik ulikkaaqqasarput. Taamaammat ernumassutaasussaangilaq imak annikitsigisumik akitsuusersuissagaanni. Qanorpiarlu akitsuut taanna inissinneqarsinnaanersoq, takornarissanut ajoqutaasussaangitsumik, nunatsinnullu annertunerpaamik iluanaarutaasinnaasumik, tassa Naalakkersuisut misissoqqullugit siunnersuuteqartup kissaataa Atassummiit tamakkiisumik taperserparput.

Nunat allat tamangajavimmik takornarissanut unnuinermut akitsuuteqartittarpaat. Akitsuullu taanna annikitsuusarmat takornariap annertunerusumik malugineq ajorpaa. Aap, Atassummiit isumaqataalluinnarpugut akitsuut qaffasippallaarpat takornarissat nunarput tikikkumajunnaarsinnaagaat. Tamannarpiarlu pillugu misissorluartariaqarparput naleqquttumik qanoq inissiisinnaanerluta.

Uagut Kalaallit immitsinnut akitsuusersortuarpugut, akileraarutigullu taamak annertoreertigisut. Taamaammat takornarissat unnuisarneri annikitsumik aamma akitsuusilaartariaqalerpagut. Ilumoorporlu siornatigut umiarsuarnut takornariartaatinut annertuumik akitsuummik qaffaasoqarnikuugaluarpoq. Tamannalu ilinniarfigalugu naapertuunnerusumik ingasattajaangitsumillu akitsuutit takornarissanut tunngasut ilulisersortariaqarpagut.

Mittarfissuillu sananeqareersimaleriarpata, unnuisarfiillu amerlisimaleriarpata taanna akitsuutimininnguamik taasinnaasarput annertuumik iluaqutigilersinnaavarput. Tamavittami nunami allami unnuissatilluta ajorineq ajorparput unnuisarfimmu pillutalu akitsuutimininnguaq taanna akilissallugu.

Atassummiit siunnersuut tamakkiisumik taperserparput. Kissaatigineqassappallu ataatsimiititaliamut susassaartumut innersuusseqataassaagut.